

All die Leeder

Musik & Text Björn Heuser / Verlag: HEUSERMUSIK, GMO Publishing

Jede Minscheschlag hät sing Eijenaat,
un bei uns am Rhing do es uns DNA
met dausende vun Leeder jeschmöck,
uns Muttersproch es wie Musik,
un ejal wat kohm, wat wor, die Musik wor immer för uns do.

**All die Leeder maachen uns doch us,
se sin uns Heimat, se sin Zehus,
ovv mer singe oder singe losse,
am Eng kütt et drop ahn,
dat mer nie verjiss, wie joot mer et he han,
weil mer för jede Zick et richtije Leedche han.**

Johr för Jahr, un et weeden immer mieh.
Nit nur em Karneval, em Jäjendeil, fass övverall.
Un es do ens e Leed, wat et bishier nit jitt,
ich schwöre dir, et durt nit lang, bes dat et kütt...

All die Leeder ...

Nit nur am Ahle hänge,
och ens jet Neues bringe,
un mem Bleck övver der Tellerrand.
Neue Jeschichte schrieve,
die dann för immer blieve,
Melodie, die sich en et Hätz jebrannt....

Letzter Refrain (=Modulation):

**All die Leeder maachen uns doch us,
se sin uns Heimat, se sin Zehus,
Tonartwechsel!
All die Leeder maachen uns doch us,
sin kölsche Heimat, se sin Zehus,
ovv mer singe oder singe losse,
am Eng kütt et drop ahn,
dat mer nie verjiss, wie joot mer et he han,
weil mer för jede Zick et richtije Leedche han.**